



ԱՌԱՋՆՈՐԴԱՐԱՆ ՀԱՅՈՑ
ՀԻՄՆԻՍԱՅԻՆ ԱՄԵՐԻԿԱՅԻ ԱՐԵՄՏԵԱՆ ԹԵՄԻ
WESTERN PRELACY
OF THE ARMENIAN APOSTOLIC CHURCH OF AMERICA
H.E. ARCHBISHOP MOUSHEGH MARDIROSSIAN, PRELATE
Tel: 818-248-7737/8, Fax: 818-248-7745
E-mail: Prelacy@aol.com Website: www.westernprelacy.org



Ս. ՅԱՐՈՒԹԵԱՆ ՏՕՆԸ **ՄԵՐ ԵԿԵՂԵՑԻՆԵՐՈՒՆ ՄԷՋ**

Կիրակի, 23 Մարտի առաւօտուն, մեր Թեմի եկեղեցիները պայծառացած էին Ս. Յարութեան տօնին կենսաւորող մթնոլորտով:

Մահուան, Խաւարին ու Չարին վրայ Զրիստոսի Ս. Յարութեան յաղթանակի տօնը հազարաւոր հայ հաւատացեալներ առաջնորդած էր եկեղեցի, հաղորդակից դառնալու Աստուածորդոյն գերագոյն զոհաբերութեամբ շահուած փրկութեան խորհուրդին ու իբրեւ քրիստոնէաներ՝ տոգորուելու ազգային վերականգնումի պատգամով:

Թեմիս բարեխնամ Առաջնորդ Բարձր. Տ. Մուշեղ Արք. Մարտիրոսեան այս առիթով Ս. Պատարագ մատուցանեց ու քարոզեց Կլենտլի Ս. Աստուածածին եկեղեցւոյ մէջ: Ան յիշեցուց, որ Ս. Յարութեան տօնը կանխող Աւագ Շաբաթը իւրայատուկ ժամանակաշրջան մըն է քրիստոնէայ հաւատացեալի կեանքին մէջ. Աստուածորդոյն երկրաւոր առաքելութեան վերջին հանգրուանին կապուած դէպքերու եւ պատգամներու ընդմէջէն, ան կը պատրաստուի տօնական այս օրուան, որ կը մարմնաւորէ Զրիստոսի աշխարհ առաքելութեան գերագոյն նպատակը՝ զոհաբերում մարդու մեղքերուն համար, քաւութիւն շնորհել մեղաւորին ու անկեալին, վերջապէս՝ մահուան վրայ տարած Իր յաղթանակով, յարութեան ու յաւիտենական կեանքի յոյսն ու խոստումը պարգեւել մահկանացուներուս:

Առաջնորդ Սրբազանը աղօթք բարձրացուց առ Աստուած, որ հայ հաւատացեալները պահէ Իր կամքին համաձայն ընթացքի մէջ, հայութեան ու Հայրենիքին պարգեւելով քրիստոնէավայել գործի ընթացք: